

摘藻堂四庫全書薈要

史部

欽定四庫全書薈要

史部

文獻通考卷七十一

詳校官員外郎臣潘紹觀



欽定四庫全書薈要卷九千三百九十一

史部

文獻通考卷七十一

鄱陽馬端臨貴與著

 鄱社考四
郊

梁太祖開平二年十一月自東京赴洛都行郊天禮自
石橋備儀仗至郊壇

三年正月以河南尹張宗奭為南郊大禮使

故事皆以
宰相為之

今用河南尹
充非常例也

周太祖廣順三年九月太常禮院奏准勅定郊廟制度
洛陽郊壇在城南七里丙巳之地圓丘四成各高八尺
一寸下廣二十丈再成廣十五丈三成廣十丈四成廣
五丈十有二陛每節十二等燎壇在泰壇之丙地方一
丈高一丈二尺開上南出戶方六尺請下所司修奉從

之

時周太祖將拜
南郊故修奉之

梁太祖南郊二

開平三年正月二十四日
其年十一月二日

後唐莊宗南郊一

同光二年二月一日

明宗南郊一

長興元年二月二十一日

周太祖南郊一

顯德元年正月一日

宋初因唐舊制每歲冬至圜丘正月上辛祈穀孟夏雩祀季秋大享凡四祭昊天上帝親祀則并皇地祇位作壇於國城之南薰門外依古制四成十二陛三壝設燎壇於內壇之外內地高一丈二尺又設皇帝更衣大次於壇外東壝東門之內道北南向

太祖皇帝乾德元年十一月甲子親郊奉宣祖配大赦
改元

先是詔以冬至有事南郊有司言冬至乃十一月晦
前一日皇帝始郊不應近晦乃改用十六日甲子太
常博士和峴言祭不欲數今十一月十六日親祀南
郊請權停二十七日南至之祀從之十三日上宿齋
於崇元殿翌日服通天冠絳紗袍執鎮圭乘玉輅由
明德門出羣臣夾侍鹵簿前導赴太廟五鼓朝享禮

畢質明乘輅赴南郊齋於帷宮上初詣太廟乘玉輅
左諫議大夫崔頌攝太僕上問儀仗名物甚悉頌應
對詳敏上大悅十六日服袞冕執圭合祭天地於圜
丘以皇弟開封尹光義為亞獻興元尹光美為終獻
將升壇有司具黃褥為道上曰朕潔誠事天不必如
此命徹之還宮將駕金輅顧左右曰於典故可乘輦
否對以無害乃乘輦壬申以南郊禮成大宴廣政殿
號曰飲福自是為例

五代以來宰相為大禮使太常卿為禮儀使御史中丞為儀仗使兵部尚書為鹵簿使京府尹為橋道頓遞使宋制大禮頓遞如舊而大禮使或以親王為之又專以翰林學士為禮儀使其儀仗鹵簿使或以他官充

是年司徒兼侍中范質為南郊大禮使翰林學士承旨禮部尚書陶穀禮儀使刑部尚書張昭

鹵簿使御史中丞劉溫叟儀仗使皇弟開封尹光義橋道頓遞使

太平興國元年始

鑄五使印

石林葉氏曰南郊五使唐制甚詳考於會要纔見

長慶後有以太常卿為禮儀使御史中丞為大禮使爾不知禮儀大禮何以為別也其以宰相為大禮使禮部尚書為禮儀使御史中丞為儀仗使兵部尚書為鹵簿使開封尹為橋道使者蓋後唐之制故本朝用之但改太常卿為禮儀使爾太常卿既不常置而中丞兵部官或闕則例以學士及他曹尚書侍郎代之大禮掌贊相鹵簿掌儀衛橋道掌頓遞禮儀掌禮物儀仗無正所治事但督察百

司不如禮者而已真宗東封西郊嘗專用輔臣天禧後罷至元符初始召並用執政遂著為令

長編通考曰恭考太祖南郊凡四自後宿齋朝享儀禮降赦率如初惟開寶四年始用繡衣鹵簿先是大駕鹵簿衣服旗幟止以五綵繪畫至是盡易以繡九年以江表底定方內大同用申報謝乃幸西京以四月有事於南郊先是霖雨彌旬及赴齋宮之日雲物晴霽觀者如堵咸相謂曰我輩少逢

亂離不圖今日復覩太平天子儀衛皆相對感泣
又考鹵簿凡四等大駕法駕鑾駕黃麾仗大駕郊
祀籍田薦獻玉清昭應景靈宮用之

按梁太祖始建都於汴然郊壇則在洛都開平二
年十一月南郊帝自東京至洛都行禮自石橋備
儀仗至郊壇三年正月以河南尹張宗奭為南郊
大禮使後唐莊宗同光二年帝祀南郊初梁均王
將郊祀於洛陽聞楊劉陷而止其儀物具在至是

張全義請上亟幸洛陽謁廟畢卽祀南郊從之然則梁唐行郊祀皆在洛陽國初始作郊壇於國城南薰門外開寶九年詔曰定鼎洛邑我之西都燔柴泰壇國之大事今江表底定方內大同祇適景靈用申報謝乃眷西顧郊兆存焉將飭駕以時巡躬展誠於陽位朕今幸西京以四月有事於南郊宜令有司各揚所職以是觀之藝祖親郊凡四獨是歲行之於洛陽然凡郊必以陽至之月獨是歲

以四月乃是行大雩之禮蓋本非彝典帝以洛都
元有郊兆是年又有欲徙都於洛之意故因西幸
而特行其禮云

太宗太平興國三年十一月丙申郊奉太祖配

國初以來南郊四祭及感生帝皇地祇神州凡七祭
並以四祖迭配而太祖親郊者四並以宣祖配上卽
位以宣祖太祖更配是年合祭天地始奉太祖升侑
焉 雍熙元年郊扈蒙定禮奏言經曰嚴父莫大於

配天請以宣祖配天太祖配上帝乃用其議識者非之淳化四年禮儀使蘇易簡上言按唐永徽中以高祖太宗同配上帝欲望親祀郊丘奉宣祖太祖同配其常祀孟春祈穀孟冬神州季秋大享以宣祖崇配冬至圓丘夏至北郊孟夏雩祀以太祖崇配從之淳化三年禮儀使言皇帝親郊故事在京並去圓丘十里內神祠及所過橋道並差官致祭而獨遺太社太稷文宣武成王等廟今請事出宮前一日遣官致祭從之

至道三年十一月時真宗已卽位有司上言冬至祀圜丘孟夏雩祀夏至祭方丘請奉太宗配上辛祈穀季秋大享明堂奉太祖配上辛祀感生帝孟冬祀神州地祇奉宣祖配其親郊圜丘奉太祖太宗並配詔可

大中祥符四年職方員外郎判太常禮院孫奭言準禮冬至祀圜丘有司攝事以天神六百九十位從祀今惟有五方上帝及五人神十七位天皇大帝以下並不設位且太昊勾芒惟孟夏雩祀季秋大享及之今乃祀於

冬至恐未叶宜詔兩制及崇文院詳定翰林學士鼂迥等言按開寶通禮圜丘有司攝事祀昊天配帝五方帝日月五星中外官衆星總六百八十七位雩祀大亨昊天配帝五天帝五人帝五官總十七位方丘祭皇地祇配帝神州嶽鎮海瀆七十一位今司天監所設圜丘雩祀明堂方丘並十七位卽是方丘有嶽從祀圜丘無星辰而反以人帝從祀參詳故事實爲闕典望如輿所請以通禮神位爲定其有增益者如後勅奏可

景德三年崇文院檢討陳彭年言禮記月令正月天子以元日祈穀於上帝註云為上辛祈穀郊祀昊天上帝又春秋傳曰啓蟄而郊郊而後耕蓋春氣初至農事方興郊祀昊天以祈嘉穀故當在建寅之月迎春之後矣自晉泰始二年始用上辛不擇立春之先後齊永明元年立春前郊議者欲遷日王儉啓云宋景平元年元嘉六年並立春前郊遂不遷日其後吳操之又云應在立春後然則左氏所記啓蟄而郊乃三代彝章百王不易

王儉所啓郊在春前乃後世變禮經籍無聞載詳月令正月元日祈穀則明在正月之辛左氏啓蟄而郊郊而後耕則明在立春之後參較其義煥然無疑來年正月十日立春三日上辛祈穀斯則襲王儉之末議違左氏之明文禮有未安事當復古

乾興元年真宗崩詔禮官定遷郊祀配帝乃請孟春上辛祈穀孟冬祭神州地祇以太祖配孟夏雩祀冬至祀昊天上帝夏至祭皇地祇以太宗宗配上辛祀感生帝

以宣祖配季秋大享明堂以真宗崇配皇帝親祀郊丘以太祖太宗崇配奏可

故事三歲一親郊不郊輒代以他禮慶賞與郊同而五使皆輔臣不以官之高下天聖二年翰林學士領儀仗御史中丞領鹵簿始用官次

天聖五年十一月癸丑郊以翰林學士宋綬攝太僕陪玉輅上問儀物典故綬占對辨給因使綬集羣官撰集天聖鹵簿圖記上之禮儀使請郊後詣王清昭應景靈

宮詔郊前享景靈近臣奏告玉清昭應擇日恭謝大禮
使王曾請節廟樂帝曰三年一享不敢憚勞也三獻終
增禮生七人各引本寶太祝升殿徹豆三日又齋長春
殿謝玉清昭應宮

沈氏筆談曰上親郊廟冊文皆曰恭薦歲事先景
靈宮謂之朝獻次太廟謂之朝享末乃事於南郊
予集郊式時曾預討論常疑其次序若先為尊則
郊不應在廟後若後為尊則景靈宮不應在太廟

之先求其所從來蓋有所因按唐故事凡有事於上帝則百神皆預遣使祭告唯太清宮太廟則皇帝親行其冊祝皆曰取某月某日有事於某所不敢不告宮廟謂之奏告餘皆謂之祭告唯有事於南郊方為正祠至天寶九載乃下詔曰告者上告下之詞今後太清宮宜稱朝獻太廟稱朝享自此遂失奏告之名冊文皆為正祠

楊氏曰愚按卜郊受命於祖廟作龜於禰宮疏引

禮器魯人將有事於上帝必先有事於類宮為證
禮器註云魯以周公之故得郊於上帝先有事於
類宮告后稷也夫有事謂告祭也郊事至重又尊
祖以配天故先告於祖而受命焉乃卜日於禩宮
自此以後散齋七日致齋三日齋戒以神明其德
將以對越上帝此則古禮然也太祖皇帝乾德六
年十一月初行郊祀先是十三日宿齋於崇元殿
翼日赴太廟五鼓朝享禮畢質明乘玉輅赴南郊

齋於帷宮十六日行郊祀禮夫五鼓朝享於太廟
質明乘輅赴南郊齋於帷宮又二日而郊祀此則
不拘古禮以義起之深得古人告祭於太廟之意
而又不失乎致齋之嚴也其後有司建明或失其
中仁宗天聖二年八月太常禮院上言南郊合行
薦告之禮望降所用日詔將來玉清昭應宮景靈
宮太廟同日行禮後五年禮儀使劉筠奏曰天聖
二年南郊制度皇帝自大安殿一日之內數次展

禮萬乘之陟降為勞百執之駿奔不暇欲乞將來
南郊禮畢別定日詣玉清昭應宮景靈宮行恭謝
之禮夫劉筠之請蓋欲避一日頻併之勞也然薦
告者郊前之禮也恭謝者郊後之禮也劉筠欲易
郊前薦告之禮為郊後恭謝之禮蓋亦以玉清昭
應宮景靈宮非禮之正不欲指言其事故為是婉
辭以達意也景祐五年十月侍講賈昌朝言朝廟
之禮本告以配天享侑之意合於舊典所宜奉行

其景靈宮朝謁蓋沿唐世太清宮故事有違經訓
固可改革欲望將來朝廟前未行此禮候郊禮畢
詣景靈宮謝成如下元朝謁之儀所冀尊祖事天
禮簡誠至夫賈昌朝之說卽劉筠之說也然劉筠
之議婉而明不若賈昌朝之言嚴而正

岳氏愧郊錄曰珂前辨南北郊妄意以禮之大者
與常禮異折衷古今以俟博識及考元豐六年十
月庚辰太常丞呂升卿所奏則先廟後郊當時亦

嘗有議之者反覆其論可謂至當而迄不見用於時蓋有弗便乎今雖欲力行不可得也珂故因是而發其餘論焉升卿之言曰近以郊祀致齋之內不當詣景靈宮及太廟朝享遂具奏伏聞止罷景靈宮諸處朝謁而天興殿及太廟朝享如故臣伏以郊丘之祀國之大事有天下者莫重乎享帝臣歷考載籍不聞為祀天致齋乃於其間先享宗廟者也獨有唐天寶之後用田同秀之言立老子廟

號曰太清宮是歲將行郊祀以二月辛卯先躬享
焉祀用青詞饋用素饌甲午又親享於太廟丙申
乃有事於南郊終唐之世奉而行之莫知其非雖
論者以為失禮然考其初致齋之日乃辛卯享於
太清宮至丙申殆且五日乃得雍容休息以見上
帝也今陛下致齋三日其一日於大慶殿而用其
二日三行禮焉古之大祀未有不齋三日而敢與
神明交者故經曰齋三日一日用之猶恐不敬二

日伐鼓何居蓋先王之於祭祀之齋如此其謹也
今陛下行禮於天興殿纔齋一日爾其之大廟與
郊宮也前祀之一日皆嘗用之矣謂之一日之齋
尚非全也夫用一日之齋以修大祀未見其可況
非全日乎於以奉宗廟則齋之日不足於以事上
帝則齋之儀不專陛下恭嚴寅畏三歲一修大禮
將以受無疆之休其為致齋者乃如此殆未稱昭
事之意也今太廟歲有五大享皆如古矣又於郊

祀復修遍享之禮此為何名乎論者曰宗廟之禮未嘗親行故因郊祀恭展薦獻臣曰不然唐太宗時馬周言曰陛下自踐位宗廟之享未嘗親事竊惟聖情以乘輿一出所費無藝故忍孝思以便百姓遂俾唐史不書皇帝入廟何以示來葉良謂此也且人主於宗廟之享自當歲時躬修其事其不親享者蓋後世之失禮也今日必因郊禮以行之則義尤不可夫因者不致專之謂也七世聖神儼

在清廟朝廷不特講歲時親行之禮而因以享之
此非臣之所聞也臣愚以謂今郊禮宜如故事致
齋於大慶殿二日徑赴行宮其宮廟親享並乞寢
罷或車駕必欲至太廟卽乞止告太祖一室以侑
神作主之意徹去樂舞以盡尊天致齋之義其天
興朝享乞更不行請如新降朝旨俟禮畢而恭謝
伏請繼今日以往別修太廟躬祀之制歲五大享
乘輿親臨其一焉仍望自今歲臘享為首於明年

行春祠之禮禴與烝嘗自次年以叙終之每遇行廟享之時則罷景靈宮一孟朝謁之禮廟享致齋乞於內殿出入如常儀如此則祀天享親兩得其當矣珂按先廟後郊蘇文忠軾嘗引書武成證為周禮而珂固疑其卽變禮以為常矣升卿謂古之大祀未有不齋三日而敢與神交者考之武成厥四月丁未祀於周廟越三日庚戌柴望大告武成雖禮之變猶必歷三日而後柴望則升卿之言豈

非明據然珂謂升卿之論廟享歲五大享而臨其一乃殺禮也非備禮也行廟享之時則罷景靈宮一孟朝謁之禮廟享既與景靈宮迭用且致齋內殿出入如常儀乃常禮也非大禮也夫天地大祭也祖宗大祭也隆禮備物不可偏廢其勢必如仁宗祫享之制始合於禮之宜夫嘉祐之行祫也以代三年之郊也輅而齋冕而事門而肆眚皆郊制也前乎元年恭謝乎大慶後乎七年大享於明堂

則四年之祫適三年之中也如升卿言是以常禮
享祖宗而以大禮祀天地也若每歲而入廟又三
歲而出郊禮有隆而無殺知其必不能也知乎此
又益知乎南北郊之不可以兼舉也分郊而祭舍
升卿之說則太廟原廟之享不知其存乎否也苟
存也則先南郊祀之先北郊則祀之祖宗之祭二
而天地之祭一祖宗三歲而徧天地六歲而徧以
卑踰尊不可也苟廢也則原廟恭謝之制就可如

升卿之說而太廟則不可以乏享也享不可以殺
禮也是又於何時增此一郊邪其疏其數將於此
乎益無統矣

按三歲親郊而所祭者凡三一日祀原廟二日祀
太廟三日詣園丘行禮此禮始於唐而宋因之楊
氏所引劉筠賈昌朝之說則以為前二日之享廟
告祭也岳氏所引呂升卿之說則以為前二日之
享廟正祭也然以愚觀之以為告祭則其禮太過

以為正祭則其禮無名蓋登極立太子冊后上祖宗徽號之類皆典禮之重大而希罕者若三歲一郊則事天之常禮耳今登極等告祭未嘗親行而獨於三歲郊祀則親舉告禮此所謂太過也春禴夏禘秋嘗冬烝三歲一祫五歲一禘皆歷代相承宗廟之大祭今此諸祭未嘗親行而獨於三歲郊祀之前特創一祭此所謂無名也蓋近代以來天子親祠其禮文繁其儀衛盛其賞賚厚故必三歲

始能行之而郊祀所及者天地百神與所配之祖而已於宗廟無預故必假告祭之說就行親祀宗廟之禮焉於事則簡便矣謂之合禮則未也

景祐二年十一月乙未郊三聖並侑先是禮院言太祖太宗真宗三廟皆萬世不遷至於南郊以太祖定配二宗迭配將來皇帝親祠且請以三聖皆侑上顯對越之盛次伸邁追之感此後迭配還如前議歲時常祀則至日圜丘仲夏皇地祇配以太祖孟春祈穀夏雩祀冬祭

神州配以太宗孟春感生帝配以宣祖季秋大享配以
真宗先是上親製郊廟樂章二十一曲財成頌體告於
神明詔宰臣呂夷簡等分造樂章參施羣祀

禮院言周官朝日祀五帝則張大次小次說者以為
祀昊天上帝亦然大次在壇壇外猶更衣幄小次在
壇側今所未行按魏武帝祠廟令降神訖下階就叢
而立須奏樂畢似若不愆烈祖遲祭不速訖也故吾
坐俟樂闋送神乃起耳然則武帝坐俟容須別設近

次與周官義符請設小次於皇帝版位少東每獻畢降壇若殿就小次俟終獻徹豆復就版位其後有司又言郊廟罇罍數皆準古而不實三酒五齊明水明酒有司相承名為看器郊廟天地配位惟用祠祭酒分大中祠位二升小祠位一升止一罇酌獻一罇飲福宜詔酒官依法制齊酒分實罍有司取明水對明酒實於上罇禮官以為鄭氏註周禮五齊三酒惟引漢時酒名擬之而無制造法乃仍舊用祠祭酒一等

壇殿上下罇罍有司毋設空器並如唐制以井水代
明水明酒正配位酌獻飲福舊用酒二升者各增二
升從祀神位用舊升數實諸罇罍

岳氏愧郗錄曰珂之仕中朝屢攝官涖祠祭每見
罇彝之設五齊有其名而實無之惟將事則取具
天府蓋止一色公醕耳聞之容臺吏罇幕之下率
多空惟一罇僅寘杯勺以共祭他日又攝光祿丞
得先祭贊閱視酒饌又攝太官令躬酌酒實爵得

窺其中蓋皆如言則其初點饌之際執事者徒再
唱酒齊之目而已於以驗其名殊而實一也嘗讀
周禮正義頗疑醢法不明古制難復考之通鑑長
編元豐六年十月甲申光祿卿呂嘉問言光祿掌
酒醴祠祭罇壘相承用法酒庫三色法酒以代周
禮所謂五齊三酒恐不足以上稱陛下崇祀之意
近於法酒庫內酒庫以醢酒法式考之禮經五齊
三酒今醢酒其齊冬以二十五日春秋十五日夏

十日撥醅甕而浮蟻湧於面今謂之撥醅豈其所
謂泛齊邪接取撥醅其下齊汁與滓相將今謂之
醅芽豈其所謂醴齊邪既取醅芽置筥其中其齊
葱白色入焉今謂之帶醅酒豈其所謂盎齊邪冬
一月春秋二十日夏十日醅色變而微赤豈其所
謂緹齊邪冬三十五日春秋二十五日外撥開醅
面觀之上清下沉豈其所謂沈齊邪今朝廷因事
而醞造者蓋事酒也今踰歲成熟蒸醞者蓋昔酒

也同天節上壽燕所供臘醕酒者皆冬醕夏成蓋清酒也此皆酒非所謂齊也是知齊者因自然之齊故稱名酒者成就而人功為多故享神以齊養人以酒竊恐典禮如此又司罇彝曰醕齊縮酌盎齊沈酌依經傳則泛齊醴齊以事酒和之用茅縮酌其盎齊緹齊沈齊則以清酒和之不用茅縮酌如此則所用五齊不多而供具亦甚易蓋醕酒料次不一此五種者成而皆自然伏望聖斷以今之

所造酒與典禮相詳審或不至差謬乞自今年郊
廟共奉上批嘉問論證似有理趣今宗廟所實樽
彝酒齊未備就且如其說用之於理無害然則當
時蓋嘗施用而又前乎慶歷後乎大觀皆經講明
具珂後記彌文祿容交舉並修要必不廢特建炎
南渡之後有司失其職耳非故事也祖宗恣祀存
古之意最為嚴重是說其有稽焉

又曰慶歷元年十月十五日同判太常寺呂公弼

言按開元禮崇祀錄昊天上帝皇地祇六罇太罇
為上實以泛齊著罇次之實以醴齊犧罇次之實
以盎齊象罇次之實以醢齊壺罇次之實以泛齊
山罍為下實以三酒配帝著罇為上實以泛齊犧
罇次之實以醴齊象罇次之實以盎齊山罍為下
實以清酒皆加明水明酒實於上罇五方北極天
皇大帝神州地祇大明夜明太罇實以泛齊五星
十二辰河漢象罇實以緹齊中官壺罇五方山林

川澤蜃罇並實以泛齊外官概罇五方丘陵墳衍
原隰散罇並實以清酒衆星散罇實以旨酒皆用
明酒各實於上罇宗廟每室設竿彝黃彝著罇之
上罇皆實以明水黃彝實鬱鬯著罇實以醴齊又
司烜氏以鑑取明水於月鄭康成云鑑類取水者
世謂之方諸取月之水欲得陰陽之潔氣也臣謹
以古制考五齊三酒卽非難得之物將來郊廟祭
享宜詔酒官依法制齊酒分實罇壘仍命有司取

明水對明酒實於上罇或陰鑑方諸之類未能猝
辨請如唐制以井水代之下博士議而奏曰比郊
廟祠祀壇殿上下所設罇壘惟酌獻飲福二罇實
以祠祭酒餘皆徒設器而不實以五齊三酒明水
明酒誠於禮為闕然五齊三酒鄭康成註周禮惟
引漢時酒名擬之而無制造之法今欲仍舊用祠
祭酒一等其壇殿上下罇壘有司不得更設空器
其明水明酒並以井水代之其正配逐位酌獻飲

福舊用酒二升者各增二升從祀神位並用舊升
數實諸罇壘配以明水明酒從之既曰從其請則
自慶歷以來雖欲用之而不能詳其法矣此元豐
呂嘉問之請所以有為而發也還考元豐元年七
月二日詳定郊廟奉祀禮文所言古之祭祀以五
齊薦諸神以三酒酌諸臣其用不同今罇雖具均
以法酒實之而無清濁厚薄之異是名物徒存而
亡其實也再詳五齊鄭氏以為醴味與酒味異其

餘四齊味皆似酒祭祀必用五齊者至恭不尚味而貴多品也若三酒則人所飲也事酒為有事而新作者卽今卒造之酒昔酒久醞乃熟故名以昔二者色皆白清酒久於昔酒故色清而味厚欲令法酒庫內酒坊以見造制逐色酒實之從之則三酒當時尚未備五齊固可從而知不知公弼之奏以後復曾講明不禮文之所言乃在嘉問奏論五年之先則遐想中間酒齊醞法之不講亦云久矣

珂前記空罇似出有司之吝考之宣和三年七月
二十二日尚書省言潭州奏春秋上丁釋奠并祭
社稷風雨師等合用罇齊酒醴政和中儀曹曹洪
考三禮圖罇受五斗之制遂每罇用其數以一歲
計之至用酒六百六十八石委是虛費今在京釋
奠正配位每罇設酒二升從祀每位五合乞下諸
路州軍依此從之則在承平時罇已不盈矣慶歷
公弼之言有司相承名為看器則雖盡空其罇固

無怪云宣和之有司猶有取於節今祠祭廼不然
罇固皆有酒可實特先期緘餅缶以均奉祠者臺
阜無遺焉是上不以費靳而下廼以私取不可之
大者也

嘉祐七年春詔南郊奉太祖定配

先是諫官楊畋論水災繇郊廟未順下禮院禮院言
對越天地神無二主唐垂拱中始用三祖同配至開
元親享遂罷之皇祐詔書南郊三聖並侑後疊配未

幾復並侑為定制雖出孝思然頗違禮經下兩制議從之

英宗治平二年合祭天地於南郊以太祖配故事皇帝將就版位祠官回班向皇帝須就位乃復侍臣跪讀冊至御名則興至是詔以尊奉祠勿回班及興時呂公著攝太僕卿參乘為上言仁宗親祠徹黃道以登虛小次不入上皆循用之 正月上辛祈穀慶歷用犢一羊二豕二其日祀感生帝羊二豕二正配簠簋俎各增為二

前一日太祝讀祝視祭玉餘如冬至攝事三獻終禮生
引司天監壘洗升詣四方帝神位上香奠幣爵并行一
獻再拜復治平二年禮院言準閤門儀制祀天地致齋
皇帝不遊幸作樂緣壽聖節在致齋內若用慶歷元年
嘉祐七年元會例更用中辛當在十六日又十四日例
詣慈孝等寺集禧觀行禮觀燈作樂若遣官攝事無不
聽樂元日朝會壽聖節多與上辛相近常改用中辛非
尊事天神之意嘉會合禮又不宜徹樂因詔遇元正御

殿聖節上壽雖在上辛祠官致齋日亦用樂大宴移日
或就賜

神宗熙寧元年詔令兩制以上至臺諫官與太常禮院
同詳定今年冬至當與未當親行郊禮

翰林學士承旨王珪上議曰按王制喪三年不祭唯
祭天地社稷為越紼而行事傳謂不敢以卑廢尊也
是則居喪而可得見天地也春秋僖公三十三年傳
凡君薨卒哭而祔祔而作主特祀於主烝嘗禘於廟

杜預以謂新主既特祀於寢則宗廟四時常祀自當如舊是則居喪而可得見宗廟也周公稱商高宗諒闇三年不言子張疑之以問仲尼仲尼答云何必高宗古之人皆然高宗不云服喪三年而云諒闇三年者杜預又謂古者天子諸侯三年之喪既葬而服除諒闇以居心喪不與士庶同禮也然則服除之後郊廟之祭可勿舉乎南齊以前人君嗣位或仍前郊之年或別自為郊下有司議而王儉乃援晉宋以來皆

改元卽郊而不用前郊之年自漢文以來皆卽位而謁廟至唐德宗以後亦踰年而行郊況本朝景德二年真宗居明德皇太后之喪既易月而服除明年遂享太廟而合祀天地於圜丘伏請皇帝將來冬至躬行郊廟之禮其服冕車輅儀物音樂緣神事者皆不可廢詔恭依典禮其車服儀物除神事外令太常禮院詳定以聞禮院看詳欲乞除郊廟及景靈宮禮神用樂外所有鹵簿鼓吹及樓前宮架諸軍音樂皆備

而不作其逐處警場止鳴金鉦鼓角從之

十一月帝齋於郊宮罷臨觀闕不幸苑囿

故事車駕至青城少休卽召從臣幸後苑閱水嬉復
登端門觀太常警嚴至是帝精意奉祠悉罷遊觀遂
減徹門闕亭苑省草木禽獸千七百餘事至十年又
罷去寢殿後寶華門花磚砌道著為定制

七年中書門下言準詔參定南郊青城内殿宇門名請
大内門曰泰裡東偏門曰承和西偏門曰迎禧正東門

曰祥曦正西門曰景曜後三門曰拱極內門裏東側門
曰黃明西側門曰肅成大殿門曰端誠大殿曰端誠殿
前東西門曰左右嘉德便殿曰熙成後園門曰寶華從
之先時青城殿宇門名每郊命學士院撰進至是著為
定式學士院更不撰進

楊氏曰愚按註疏云齋於路寢之室唐禮散齋於
別殿致齋二日於太極殿又一日於行宮國朝冬
祀天禮惟太祖皇帝乾德六年十一月之禮可為

後世不易之法其後有司建明非一大概宿齋三日內一日於大慶殿一日於太廟一日於青城高宗中興之後檢會熙寧在京青城内殿宇門名如曰泰禋曰承和之類悉遵舊式其制可謂周備矣然令儀鸞司預先體做青城制度絞縛其行事執事陪祠官宿齋幕次亦隨宜絞縛又何其簡略也元豐四年十月八日禮官言古之王者行則嚴輿衛處則厚宮闕所以示威重備非常也故周禮王

會同則為壇宮食息則設帷宮漢祀甘泉則有竹宮至於江左亦有瓦殿本朝沿唐舊制親祠南郊行宮獨設青城幔殿宿者有風雨之憂而又無望祭之位且青城之費歲以萬數臣等欲乞倣青城之制創立齋宮一勞而省重費或遇風雨可以行望祭之禮詔送太常禮院候修尚書省了日取旨是神宗皇帝有意乎立齋宮矣但以修尚書省未畢而猶有所待也其後哲宗皇帝既建齋宮謂臣

下曰三歲一郊青城之費縑帛三十餘萬工又倍之易以屋室一勞永逸所省多矣又徽宗皇帝修建南北郊齋宿宮殿南郊曰齋宮北郊曰帷宮有司請曰事體如一而名稱不同宜並稱齋宮從之祖宗典故粲然可考今青城制度尚沿襲舊例而未革蓋亦推廣祖宗之意立為齋宮無事則嚴其扃鐃以待乘輿致齋之日而居焉暫勞而永逸一也宿者無風雨之憂或遇風雨則可以行望祭之

禮二也事有關係甚重循習甚久斷然在所當革而無疑者其此之謂乎

按會要載中書門下奏定南郊青城內殿宇門名其事在熙寧七年然楊氏所云元豐四年禮官請創立齋宮詔候修尚書省了日取旨則知齋宮元豐時尚未建而熙寧七年所奏定殿宇之名乃慢殿也然神宗卽位初郊齋於郊宮罷臨觀闕不幸池苑遂減徹亭苑省草木禽獸千七百餘事以是

觀之則知青城行宮苑囿遊觀之所畢備而獨未
建齋殿誠為闕典

元豐六年冬至郊祀昊天上帝以太祖配始罷合祭不
設皇地祇位

先是樞密院陳襄等詳定郊廟禮文上言曰伏承聖
意以天地合祭於圜丘為非典禮之正詔令更定臣
謹按周禮大司樂以圜鐘為宮冬日至至於地上之圜
丘奏之六變以祀天神以函鐘為宮夏日至於澤中

之方丘奏之八變以祭地祇夫祀必以冬至者以
其陽氣來復於上天之始也故宮用夾鐘於震之宮
以其帝出乎震也而謂之圜鐘者取其形以象天也

三一之變

圓鐘為宮三變黃鐘為角太簇為徵姑洗為羽各一變

合陽奇之數

也祭必以夏至者以其陰氣潛萌於下地之始也
故宮用林鐘於坤之宮以其萬物致養於坤也而謂
之函鐘者取其容以象地也四二之變

函鐘為宮太簇為角姑洗

為徵南呂為羽各二變

合陰偶之數也又大宗伯以禋祀實柴

禋燎祀其在天者而以蒼璧禮之以血祭沈埋醢辜
祭其在地者而以黃琮禮之皆所以順其陰陽辨其
時位做其形色此二禮之不得不異也故求諸天而
天神降求諸地而地祇出得以通精誠而逆福釐以
生烝民以阜萬物此百王不易之禮也去周既遠先
王之法不行漢元始中姦臣妄議不原經意附會周
官大合樂之說謂當合祭平帝從而用之故天地共
牘禮之失自此始矣由漢歷唐千有餘年之間而以

五月親祠北郊者惟四帝而已如魏文帝之太和周

武帝之建德隋高祖之開皇唐睿宗之先天皆希闊

一時之舉也然而隨得隨失卒無所定垂之本朝未

遑釐正恭惟陛下恢五聖之述作舉百王之廢墜臣

以謂既罷合祭則南北二郊自當別祀伏望陛下每

遇親祠之歲先以夏日至祭地祇於方丘然後以冬

日至祀昊天於圓丘此所謂大者正也然議者或謂

先王之禮其廢已久不可復行古者齋居近

古者致齋路寢

儀衛省用度約賜予寡故雖一歲遍祀而國不費人
不勞今也齋居遠儀衛繁用度廣賜予多故雖三歲
一郊而猶或憚之況一歲而二郊乎必不獲已則三
年而迭祭或如後漢以正月上丁祠南郊禮畢次北
郊或如南齊以上辛祀昊天而次辛墜后土不亦可
乎臣竊謂不然記曰祭不欲踈踈則怠夫三年迭祭
則是昊天大神六年始一親祀無已怠乎記曰大事
必順天時二至之郊周公之制也捨是而從後王之

失可謂禮歟彼議者徒知苟簡之便而不睹尊奉之
嚴也伏惟陛下鑒先王已行之明效舉曠世不講之
大儀約諸司儀衛而幸祠宮均南郊之賜予以給衛
士蠲青城不急之務損大農無名之費使臣得以講
求故事參究禮經取太常儀註之文以正其訛謬稽
大駕鹵簿之式以裁其繁冗惟以至恭之意對越大
祇以迎至和格純嘏庶成一代之典以示萬世

又曰臣某等恭惟本朝冬至祀天南郊夏至祭地北

郊每歲行之皆合於古猶以有司攝事為未足以盡志於是三年一郊而親行之夫三年一郊而親行之蓋所謂因時制宜者也施之於今誠不可易惟合祭之禮在所當正禮曰魯人將有事於上帝必先有事於泮宮所以然者告祖為配之謂也又曰晉人將有事於河必先有事於惡池齊人將有事於泰山必先有事於配林所以然者先卑後尊之謂也臣等推古以知今推諸侯以知天子欲乞每遇親郊七日戒之

後三日宿之時宿太廟以告宿北郊以祭宿南郊以祀所以先太廟者告祖為配也所以先北郊者先卑後尊也雖然自北郊至南郊相去為遠則中道不可以無舍請為帷宮止而後進如允所奏乞下有司施

行

禮後漢因祠南郊即祠北郊明堂世祖廟及太廟謂之五供唐因祠南郊即祠太清宮及太廟謂之

三大禮本朝三歲郊祠必先景靈宮及太廟蓋因前制然每歲夏至於北郊自有常祠祀兼常歲有司攝事於南郊亦不合祭天地其合祭之意止緣親祠欲徧及爾若以親祠欲徧及之則因南郊同時告祭北郊自因舊儀亦不肯違禮意近於可行伏乞更賜參酌施行

於是詔禮官講求翰

林學士張璪以為冬至祀天夏至祀地不易之理今祀地欲改用他月無所據依必不得已宜於郊祀之歲夏至之日盛禮容興樂舞一如南郊之儀命宰攝事而王存曾肇言今北郊常差中書門下官乃冢宰之任樂舞之類亦開元開寶舊禮所載特近世廢闕二者皆有司攝事常行之典未足以代親祠之重恐於父天母地之文有所未順判太常寺陳薦言議者以天地合祭始於王莽故欲罷之臣按周頌昊天有

成命郊祀天地也漢郊祀歌曰惟泰元尊媼神蕃釐
泰元天也媼神地也又曰涓選休成天地並況此天
地同祀可以概見恐非自王莽始也議者又謂方丘
之祀盛夏不躬行宜選冢宰攝祀亦恐未必合古然
終不若天地合祭也乞且循舊制知禮院曾肇言今
冬至若罷合祭而夏至又使有司行事則於父母天
地之義若有隆殺願陛下遇親祠南郊之歲以夏至
日躬歛北郊以合先王之制遂詔罷南郊合祭親祠

北郊並依南郊儀如不親祠上公攝事

自元豐元年上命樞密直學士陳襄等詳定郊廟奉祀禮文大正歷代典禮之失至是歲親祀圜丘始用新儀

國朝親郊止服袞冕至是稽古始加服大裘而被以袞冕

詳定禮文所議禮記曰郊特牲而社稷太牢又曰祭天地之牛角繭栗配位亦特牲書曰用牲於郊牛二是也宋朝儀注昊天上帝皇地祇太祖皇帝之位各設三牲俎非尚質貴誠之議請親祠圜丘方澤正配

皆用犢不設羊豕俎及鼎七有司攝事亦如之郊之祭也器用陶匏以象天地之性禋用白木以素為質今郊祀簠簋罇豆皆非陶又用龍杓未合禮意請圜丘方澤正配位所設簠簋罇豆改用陶器仍以禋為杓祀天之有禋柴猶祭地之有瘞血享廟之有裸鬯皆歆神之始非謂於祭之末燔燒胙餘也至後世之燔瘞牲幣於祭末而不知致神於其始則是備於後而闕於先也請南北郊先行升禋瘞血之禮至薦奠

禮畢卽如舊儀於壇坎燔瘞牲幣北郊祭皇地祇及神州地祇當為坎瘞埋今乃建壇燔燎祝版考先儒所說地祇卽無禋燎之文請祭皇地祇祝版牲幣並瘞於坵不設燎壇熙寧祀儀惟昊天上帝皇地祇高禩燔瘞首自感生帝神州地祇而下皆不燔瘞牲體殊不應禮又按周禮羊人祭祀割羊牲登其首禮記曰升首報陽也首為陽則脅與髀為陰可知矣報陽宜以陽報陰宜以陰各從其類也請自今昊天

帝感生皆燔牲首以報陽皇地祇神州地祇太社太稷凡地祇之祭皆瘞牲之左髀以報陰凡薦享太廟皆升首於室

又曰臣等見親祠南郊儀註並云祀前三日儀鸞司鋪御座黃道褥謹按唐故事郊壇宮廟內壝及殿庭天子步武所及皆設黃道褥壇上立位又施赤黃褥將有事命撤之武德正觀之制用紫至德以來用黃開元禮開寶通禮郊廟並不設黃道褥太常因革禮

曰舊制皇帝升壇以褥藉地象天黃道太祖命撤之
設拜於地和峴乞宣付史館天聖二年儀註又增設
郊壇壝門道北御座黃道褥康定初有司建議謂配
帝褥用緋以示損於天地而自小次之前至壇上諸
位其道褥以黃蓋非典禮是歲有詔自小次至壇下
撤黃道臣等伏詳禮記郊祭之日氾埽反道鄭氏註
謂剡令新土在上也其藉神席天地尚質則用蒲越
藁韎宗廟尚文則設莞筵紛純加縹席畫純加次席

黼純而已天子受胙乃有席周禮司几筵所謂胙席是也今來郊壇黃道褥欲更不設又言臣等看詳周官外祀皆有兆域蓋設一壇而已後世因之稍增其制東漢壇位天神從祀者甚衆至一千五百一十四神故外設重營以為等限日月在中營內南道而北斗在北之西至於五星中宮宿之屬則其位皆中營二十八宿外宮星之屬則其位皆外營然則為重營者所以等神位也唐因齊隋之制設為三壇天神列

位不出內壝而御位特設於壇下之東南若夫公卿分獻文武從祀與夫樂架饌幔則皆在中壝之內而大次之設乃在外壝者所以序祀事也蓋古者神位寡祀事簡故兆守有域以為遮列厲禁而已後世神位既衆祀事亦繁故為三壝以嚴內外之限國朝郊祀壇域率循唐制雖儀註具載圜丘三壝每壝三十步而有司乃以青繩代內壝誠不足以等神位序祀事嚴內外之限也伏請除去青繩如儀註為三壝

從之

哲宗元祐七年親郊詔今歲圜丘宜依熙寧十年故事
設皇地祇位以申始見之禮候親祠北郊依元豐六年
五月八日指揮

南郊鹵簿使兵部尚書蘇軾奏臣謹按漢成帝郊祠
甘泉泰畤汾陰后土而趙昭儀常從在屬車間時揚
雄待詔承明奏賦以諷其略曰想西王母欣然而上
壽兮屏玉女而却處妃言婦女不當與齋祠之間也

臣今備位夏官職在鹵簿準故事郊祀既成乘輿還齋宮改服通天冠絳紗袍教坊鈞容作樂還內然後后妃之屬中道迎謁已非典禮而況方當祀事未畢而中宮掖庭得在勾陳豹尾之間乎竊見二聖崇奉大祀嚴恭寅畏度越古今四方來觀莫不悅服今車駕方宿齋太廟而內中車子不避仗衛爭道亂行臣愚竊恐於觀望有損不敢不奏乞賜約束仍乞取問隨行合于勾當人施行取進止時軾為鹵簿使導駕

內中朱紅車子十餘輛有張紅蓋者爭道亂行於乾明寺前軾於車中草此奏奏入上在太廟馳遣人以疏白太皇太后明日中使傳命申勅有司嚴整仗衛自皇后以下皆不復迎謁中道

先時元祐五年五月夏至祭皇地祇命尚書右丞許將攝事將言王者父天母地三歲冬至天子親祠徧享宗廟祀天圜丘而夏至方澤之祭乃止遣上公則皇地祇遂永不在親祠之典此大闕禮望博詔儒臣

講求典故明正祀典為萬世法詔禮部太常寺及兩

省侍從官集議以聞於是翰林學士兼侍讀顧臨等

八人請合祭天地如祖宗故事俟將來親行北郊之

禮則合祭可罷臨與祖禹又言天地特祭經有明文

然自漢以來千有餘年不能行之矣宋興一祖六宗

皆合祭天地其不合祭者惟元豐六年一郊耳去所

易而就所難虛地祇之大祭失今不定後必悔之吏

部侍郎范純禮彭汝礪戶部侍郎范子奇禮部侍郎

曾肇刑部侍郎王覲豐稷權知開封府韓宗道樞密
都承旨劉安世中書舍人孔武仲陳軒太常少卿盛
陶宇文昌齡侍御史王畏監察御史董敦逸黃慶基
左司諫虞策禮部郎中孫路員外郎歐陽棐太常丞
韓治博士朱彥宗景年閻本等二十二人皆主北郊
之議而武仲又請以孟冬純陰之月詣北郊親祠如
神州地祇之祭杜純議請南郊之歲設望祠位於苑
中置權火夏至命上公攝事每獻舉權火詔依王欽

臣議宜如祖宗故事並祭天地一次汝礪肇復上疏
論合祭非是文多不載九月三省上顧臨等議太皇
太后曰宜依仁宗皇帝故事呂大防言國朝以來大
率三歲一親郊並祭天地宗廟因行赦宥頒賞軍士
遂以為常今諸儒獻議欲南郊不設皇地祇位惟祭
昊天上帝於祖宗之制未見其可蘇轍曰自熙寧十
年神宗皇帝親祠南郊合祭天地今十五年矣皇帝
卽位又已八年未嘗親見地祇乃朝廷闕典不可不

正范百祿言園丘無祭地之禮記曰有其廢之莫可
舉也先帝所廢稽古據經未可輕改大防又言先帝
因禮文所建議遂令諸儒議定北郊祀地之禮然未
經親行今皇帝臨御之始當親見天地而地祇之位
獨不設恐亦未安況本朝祖宗以恩霈四方慶賚將
士非三歲一行則國力有限今日宜為國事勉行權
制俟異時議定北郊制度及太廟享禮行之未晚太
皇太后以呂大防之言為是蘇頌鄭雍皆以古者人

君嗣位之初必郊見天地今皇帝初郊而不祀地恐未合古乃下詔曰國家郊廟特祀祖宗以來命官攝事則三歲一親郊則先享清廟冬至合祭天地於圜丘元豐間有司援周制以合祭不應古義先帝乃詔定親祠北郊之儀未之及行是歲郊祀不設皇地祇之位而宗廟之享率如權制朕方修郊見天地之始其冬至日南郊宜依熙寧十年故事設皇地祇位以嚴並況之報厥後躬行方澤之祀則修元豐六年五

月之制俟郊禮畢集官詳議典禮以聞

禮部尚書蘇軾言恭親陛下近者至日親祀郊廟神祇享答實蒙休應然則圜丘合祭允當天地之心不宜復有改更竊惟議者欲變祖宗之舊圜丘祀天而不祀地不過以謂冬至祀天於南郊陽時陽位也夏至祀地於北郊陰時陰位也以類求神則陽時陽位不可以求陰也是大不然冬至南郊既祀上帝則天地百神莫不從祀古者秋分夕月於西郊亦可謂陰

時陰位矣至於從祀上帝則冬至而祀月於南郊議者不以為疑今皇地祇亦從上帝而合祭於圜丘獨以為不可則過矣書曰肆類於上帝禋於六宗望於山川徧於羣神舜之受禪也自上帝六宗山川羣神莫不畢告而獨不告地祇豈有此理哉武王克商庚戌柴望柴祭上帝也望祭山川也一日之間自上帝而及山川必無南北郊之別也而獨略地祇豈有此理哉臣以此知古者祀上帝并祀地祇矣何以明之

詩之序曰昊天有成命郊祀天地也此乃合祭天地
經之明文而說者乃以比之豐年秋冬報也曰秋冬
各報而皆歌豐年則天地各祭而皆歌昊天有成命
也是大不然豐年之詩曰豐年多黍多稌亦有高廩
萬億及秭為酒為醴烝畀祖妣以洽百禮降福孔皆
歌於秋可也歌於冬亦可也昊天成命之詩曰昊天
有成命二后受之成王不敢康夙夜基命宥密於緝
熙單厥心肆其靖之終篇言天而不及地頌以告神

明也未有歌其所不祭祭其所不歌也今祭地於北郊獨歌天而不歌地豈有此理哉臣以知周之世祀上帝則地祇在焉歌天而不歌地所以尊上帝故其序曰郊祀天地也議者乃謂合祭天地始於王莽以為不足法臣竊謂禮當論其是非不當以人廢光武皇帝親誅莽者也尚采用元始合祭故事謹按後漢書郊祀志建武二年初制郊兆於洛陽為圜丘八階中又為重壇天地位其上皆南鄉西上此則漢世合

祭天地之明驗也又按水經註伊水東北至洛陽縣
園丘東大魏郊天之所準漢故事為園丘壇八階中
又為重壇天地位其上此則魏世合祭天地之明驗
也唐睿宗將有事於南郊賈曾議曰有虞氏禘黃帝
而郊嚳夏后氏禘黃帝而郊鯀郊之與廟皆有禘也
禘於廟則祖宗合食於太祖禘於郊則地祇羣望皆
合食於園丘以始祖配享蓋有事之大祭非常祀也
三輔故事祭於園丘上帝后土位皆南面則漢嘗合

祭矣時褚無量郭山惲等皆以曾言為然明皇天寶元年二月勅曰凡所祠享必在躬親朕不親祭禮將有闕其皇地祇宜就南郊合祭是月二十日合祭天地於南郊自後有事於圜丘皆合祭此則唐世合祭天地之明驗也今議者欲冬至祀天夏至祀地蓋以為用周禮也臣請言周禮與今禮之別古者一歲祀天者三明堂享帝者一四時迎氣者五祭地者二享宗廟者四此十五者皆天子親祭也而又朝日夕月

四望山川社稷五祀及羣小祀之類亦皆親祭此周禮也太祖皇帝受天眷命肇造宋室建隆初郊先享宗廟乃祀天地自真宗以來三歲一郊必先有事景靈宮享太廟乃祀天地此國朝之禮也夫周之禮親祭如彼其多而歲歲行之不以為難今之禮親祭如此其少而三歲一行不以為易其故何也古者天子出入儀物不繁兵衛甚簡用財有節而宗廟在大門之內朝諸侯出爵賞必於太廟不止時祭而已天子

所治不過王畿千里唯以齋祭禮樂為政事能守此
則天下服矣是故歲歲行之率以為常至於後世海
內為一四方萬里皆聽命於上機務之繁億萬倍於
古日力有不能給自秦漢以來天子儀物日以滋多
有加無損以至於今非復如古之簡易也今之所行
皆非周禮三年一郊非周禮也先郊二日而告原廟
一日而祭太廟非周禮也郊而肆赦非周禮也優賞
諸軍非周禮也自后妃以下至文武官皆得蔭補親

屬非周禮也自宰相宗室以下至百官皆有賜賚非周禮也此皆不改而獨於地祇則曰周禮不當祭於圜丘此何義也哉議者必又曰夏至不能行禮則遣官攝祭亦有故事此非臣之所知也周禮大宗伯若王不與祭祀則攝位鄭氏註曰王有故則代行其祭事賈公彥疏曰有故謂王有疾及哀慘皆是也然則攝事非安吉之禮後世人主不能歲歲親祭故命有司行事其所從來久矣若親郊之歲遣官攝事是無

故而用有故之禮也議者必又曰省去繁文末節則一歲可以再郊臣將應之曰古者以親郊為常禮故無繁文今世以親郊為大禮則繁文有不能省也若帷城幔屋盛夏則有風雨之虞陛下自宮入廟自廟出郊冠通天乘大輅日中而舍百官衛兵暴露於道鎧甲具裝人馬喘汗皆非夏至所能堪也王者父事天母事地不可偏異事天則備事地則簡是於父母有隆殺也豈得以為繁文末節而一切欲省去乎國

家養兵異於前世自唐之時未有軍賞猶不能歲歲親祠天子出郊兵衛不可簡省大輅一動必有賞給今三年一郊傾竭帑藏猶恐不足郊賚之外豈有復加若一年再賞國力將何以給分而與之人情豈不失望議者必又曰三年一祀天又三年一祭地此又非臣之所知也三年一郊已為疏闊若獨祭地而不祭天是因事地而愈疏於事天自古未有六年一祀天者如此則典禮愈壞欲復古而背古益遠神祇必

不顧享非所以為禮也議者必又曰當郊之歲以十月神州之祭易夏至方澤之祀則可以免方暑舉事之患此又非臣之所知也夫所以議此者為欲舉從周禮也今以十月易夏至以神州代方澤不知此周禮之經邪變禮之權邪若變禮從權而可則合祭圜丘何獨不可乎十月親祭地十一月親祭天先地後天古無是禮而一歲再郊軍國勞費之患尚未免也議者必又曰當郊之歲以夏至祀地祇於方澤上不

親郊而通權火天子於禁中望祀此又非臣之所知也書之望秩周禮之四望春秋之三望皆謂山川在四郊者故遠望而祭也今所在之處俛則見地而云望祭是為京師不見地乎此六議者合祭可否之決也夫漢之郊禮尤與古戾唐亦不能如古本朝祖宗欽崇祭祀儒臣禮官講求損益非不知園丘方澤皆親祭之為是也蓋以時不可行是故參酌古今上合典禮下合時宜較其所得已多於漢唐矣天地宗廟

之祭皆當歲徧今不得歲徧是故徧於三年當郊之
歲又不能於一歲之中再舉大禮是故徧於三日此
皆因時制宜雖聖人復起不能易也今並祀不失親
祭而北郊則必不能親往二者孰為重乎若一年再
郊而遣官攝事是長不親事地也三年間郊當祀地
之歲而暑雨不可親行遣官攝事則是天地皆不親
祭也夫分祀天地決非今世之所能行願陛下謹守
太祖建隆神宗熙寧之禮無更改易郊祀廟享以救

寧上下神祇仍乞下臣此章付有司集議如有異論
卽須畫一解破臣所陳六議使皆屈伏上合周禮下
不為當今軍國之患不可但執周禮更不論今可與
不可施行所貴嚴祀大典以時決定取進止貼黃稱
唐制將有事於南郊則先朝獻太清宮朝享太廟亦
如今禮先二日告原廟先一日享太廟然議者或亦
以為非三代之禮臣謹按武王克商丁未祀周廟庚
戌柴望相去三日則先廟後郊亦三代之禮也

初詔議北郊典禮蘇軾主合祭之說從之者五人劉
安世主分祭之說從之者四十人又有三人欲於十
月以神州地祇之祭易夏至方丘之祀又有一人欲
上不親祠而通權火天子於禁中望拜既而朝廷復
送下三狀再令詳定安世復議略云蘇軾謂合祭圜
丘於禮為得不可復改臣等謹按周禮天子親祀上
帝凡九國朝三歲一郊固已踈闊豈可因循謬誤不
加考正古者求神以類天陽物也地陰物也歲月日

時方位牲器樂舞皆從其類今議者於聖人成法則
棄而不行猥用王莽不經之說至引夫婦同牢私褻
之語黷亂天地又引昊天有成命之詩以為證臣等
切詳此詩終篇未嘗有合祭之文序乃後儒之辭亦
謂成周之世圜丘方澤各歌此詩以為樂章耳如潛
之序曰季冬獻魚春薦鮪也豐年之序曰豐年秋冬
報也噫嘻之詩曰春夏祈穀於上帝也如此之類不
知為一祭邪抑二祭邪若郊祀賜予乃五代姑息之

弊法聖朝寬仁不欲遽罷若分而為二何所不可議者乃欲因此造為險語以動上聽又引禍福殃咎之說劫持朝廷必欲從己甚無謂也大抵臣等所守乃先王之正禮而蘇軾之議皆後世之便宜權之與正決不可合伏望聖慈詳審其當上以體神考之志下以正千載之惑豈勝幸甚方送同議官簽書其徒馳告軾曰若劉承旨議上決恐難答時蘇軾為門下侍郎遂白轍令請降旨罷議安世議狀竟不得上

紹聖元年詔罷合祭天地自今因大禮之歲以夏至之日躬祭地祇於北郊應緣祀事儀物及壇壝道路帷宮等宜令有司參酌詳具以聞蓋用蔡京等議然北郊親祠終帝世未克舉云

詳見祀后土門

左司員外郎曾旼言周人以氣臭事神近世易之以香按何佟之議以為南郊明堂用沉香本天之質陽所宜也北郊用上和香以地於人親宜加雜馥今令文北極天皇而下皆用濕香至於衆星之位香不復

設恐於義未盡禮部太常寺議衆星隨其方色用幣
每陞各設香從之



文獻通考卷七十一



總校官庶吉士臣張能照

校對官檢討臣郭寅

謄錄監生臣馬嗣全